

20/08/1998

Perdana Menteri melawat Kelantan Sabtu

KOTA BHARU, Rabu - Kira-kira 15,000 orang dijangka menghadiri majlis 'Pemimpin Bersama Rakyat' yang akan dihadiri Perdana Menteri, Datuk Seri Dr Mahathir Mohamad, di padang Sekolah Kebangsaan Kampung Chengal, Kadok di sini, Sabtu ini.

Sambutan dikenali Wacana Cinta Negara bertemakan 'Negara Kita Tanggungjawab Kita' bersempena lawatan kerja sehari Perdana Menteri ke Kelantan.

Dr Mahathir bersama isteri, Datin Seri Dr Siti Hasmah Mohd Ali, akan diberi sambutan penuh tradisi lebih 1,000 anggota perarakan, didahului perarakan bergajah diiringi panji-panji hulubalang Melayu.

Turut serta ialah perarakan Burung Petala Wati dan Maskot Sukan Komenwel, selain perarakan beberapa agensi kerajaan.

Perdana Menteri dan isteri dijangka tiba di sekolah itu dengan menaiki 'buggy' kira-kira jam 9.30 pagi.

Menteri Pembangunan Luar Bandar, Datuk Annuar Musa, berkata Dr Mahathir akan menyampaikan amanat mengenai tanggungjawab rakyat dalam usaha membantu menangani masalah kegawatan ekonomi.

"Lawatan kali ini disifatkan amat penting untuk melihat sokongan padu rakyat dalam usaha kerajaan menangani masalah ekonomi.

"Selain itu Perdana Menteri akan menemui pemimpin masyarakat, ketua jabatan agensi kerajaan Persekutuan, pemimpin politik dan penduduk," katanya kepada Berita Harian di sini, semalam.

Annuar yang juga Pengerusi Barisan Nasional (BN) Negeri, berkata Perdana Menteri dijangka merasmikan Jambatan Tok Ayah Ali bernilai RM1.3 juta.

"Perdana Menteri juga akan melancarkan penyertaan serentak 600 kampung GDW di seluruh negara yang menyertai fasa ketiga program itu termasuk Kampung Chengal.

"Pelancaran akan dibuat secara simbolik dengan melepaskan 600 belon sebelum menyertai jamuan makan tengah hari di Kem Pusat Ukhuwah Tarbiyah dan Riadah Rakyat (Putra) bersebelahan jambatan berkenaan," katanya.

Pengerusi Media dan Seranta BN negeri, Mohd Rahime Yusoff, berkata rakyat di seluruh negeri ini diminta hadir beramai-ramai pada majlis itu.

(END)